

Date – 06/07/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Larsap Gen (Rtd) Vijay Kumar Singh chuan Hmeichhiate chu nunphung zir tanna, thil tha engkim inhrilha seilen puina leh ram hmakhaw hun thui tak hriltu, chhungkaw tinte inngahna ban pawimawh tak an ni a ti.
2. MHIP President Pi Lalliani chuan MHIP chu Mizo hnahtlak kum 14 chunglam tana din ani a ti a, Mizo zawng zawng aiawh, chhiat that pawha an tana ding reng thin ani a ti.
3. Chhimthlang lam atanga furpui thawk mek Southwest Monsoon chu a zual zel avangin ramchhung hmun hrang hrangah inralring tura hriattirna chhuah a ni.
4. Union Agriculture and Rural Development Minister Shivraj Singh Chouhan chuan VB G RAM G hnuiaia sum pek hmasa ber tur Cheng vaibelchhe sing 2 leh sang 5 a pe chhuak.

<><><>

GOVERNOR : MHIP DAY

Larsap Gen (Rtd) Vijay Kumar Singh chuan Hmeichhiate chu nunphung zir tanna, thil tha engkim inhrilha seilen puina leh ram hmakhaw hun thui tak hriltu, chhungkaw tinte inngahna ban pawimawh tak an ni a ti.

Mizo Hmeichhe Insuihkhawm Pawl (MHIP) din champhaphak vawi 52-na leh MHIP Day puala thuchah a sawina ah Larsap chuan hmeichhiate chu chhungkaw tin inngahna a ni a ti a, MHIP member-te chu Mizoram Hmasawn (Viksit Mizoram) siam turin hmalakna hrang hrangte a hlawhtlin theih nan dinhmun pawimawh tak an luah thu a sawi a ni.

Larsap chuan MHIP chu Kum 50 chuang zet hmeichhiate dikna vawnhim, tharum thawhna leh enhranna thleng thei laka ven bakah inneih, inthen leh rokhawmna Dan ennawn kawngah tha nasa takin a thawh thin a ti a, Zirna, hriselna, Dan hmanga tanpui ngai puih leh vantlang rawngbawlina kaltlanga MHIP-in chhawmdawlina a pek thin hmangin hmeichhia leh chhungkaw thahnem takte dinhmun a chawikang tawh a ti bawk.

<><><>

MHIP ACTIVITIES

MHIP chuan an din champhaphak vawi 52-na pualin Branch hrang hrangah kalin zirlaite hnenah buhtlei leh puanbih zirtirna hlawk thlak tak an kalpui.

MHIP ten zirna in hrang hranga Mizo Nu ina mawhphurhna hrang hrang zirtirna an kalpui hi zirlai naupang hmeichhiaten an hlawkpui hle a, tunlai khawvel changkang zelah harsatna a awm theih avangin zirtirna hi an kalpui a ni.

MHIP General Secretary Prof Irene Lalruatkimi chuan Aizawl khawpui Branch te pawisa thawhkhawm hmangin Raltlan Refugee awmna Sihhmui Camp 1&2, Sairang Camp, Chawnpui Camp a hliam leh damlo awmte bakah Zokhawthara naupang rualbanlo tan luanchhuah a ni ati a. MHIP Day puala tanpuina an sem chhuah chu kum danga an tih thin dan anih thu a sawi a ni.

<><><>

MHIP PRESIDENT

MHIP President Pi Lalliani chuan MHIP chu Mizo hnahtlak kum 14 chunglam tana din ani a ti a, Mizo zawng zawng aiawh, chhiat that pawha an tana ding reng thin ani a ti.

MHIP Day puala thuchah a sawina he thu hi sawiin Pi Lalliani chuan MHIP chu tih bik awmlo Mizo hmeichhia zawng zawng len na ani a ti a, Mizo hnahtlak hmun hrang hranga cheng ten MHIP Day chu hlim taka lawm turin a chah a ni.

President chuan MHIP dinchhan leh a tum ber “Mite Tanpui” tih chu Member ten hre nawn tura chahin ram leh hnam tan theihtawp chhuaha midangte tana malsawmna thlentu leh mite tanpuitu ni zel turin a chah a, mahni hmeichhiatpui tanpuingai awm pawha tanpui thei turin mi tin rilru insiamthart tura chahin kawngdik kawhhuhtu ni zel turin a chah a ni.

Pi Lalliani chuan MHIP Kumpuan ‘Dikna leh Rinawmna Chawinun’ chu lanchhuah tir theih turin mahni hnathawhna leh thiltihna kawng hrang hrangah a taka nunpuitu leh midangte zirtirtu i ni zel turin MHIP member te a chah a ni.

<><><>

CADC

Larsap Gen. VK Singh-a’n Chakma Autonomous District Council (CADC) chief executive member (CEM) atana a ruat Pu Nirupam Chakma chu Nilaini (July ni 8) khian thutiam tira lakluh a ni ang.

Larsap hian Chakma Democratic Alliance (CDA) legislature party hruaitu Pu Nirupam Chakma hi CADC-a CEM ni turin a ruat a. CEM ruatna atana District Council & Minority Affairs department-in hriattirna a chhuahah chuan larsap duhdan angin CEM atana ruat thar hian ruat a nih atanga ni 7 chhungin thlawptu a ngah tawh leh tawh loh fiahna a paltlang tur a ni tih a tarlang. CEM atana thutiamtir a lakluh a nih tuk Ningani (July ni 9) khian CADC-ah thlawptu a nei ngah tawh em tih finfiahna atan ‘vote of confidence’ a hmachhawn dawn thu Pu Nirupam Chakma chuan Akashvani News Aizawl a hrilh. CDA legislature party hi BJP leh ZPM MDC te inthurualin June ni 23 a an din kha a ni a, Pu Nirupam Chakma hi hruaitu atana thlangin hemi ni vek hian CADC a executive committee an siam theih thu larsap an hriattir a ni. Sorkara an thuthehluhin a tarlan dan chuan CDA legislature party hian member 20 awmna CADC-ah hian MDC 19 thlawptu a nei niin an sawi a. BJP MDC 10 leh ZPM MDC 9-in an thlawp niin an sawi a. Eptu MDC awm chhun chu Pu Rasik Mohan Chakma, MNF a ni.

CEM atana ruat thar Pu Nirupam Chakma hi Mizoram sorkarah Minister a lo ni tawh thin a. Tunah hian National Commission for Scheduled Tribe (NCST)-ah

Member a ni mek a. CEM a nih hnu-ah NCST a member a nihna a bansan tur thu Pu Nirupam Chakma hian a sawi a, mipuite rawngbawlna atana a hun pum hman a duh thu a sawi a ni.

<><><>

MIZOTAXI APP

Lirthei hmanga eizawng pawl pathum- Mizoram Taxi Association (MTA), Aizawl Two Wheeler Taxi Association (ATTA) leh Aizawl District Auto Rickshaw Owners' Association (ADAROA) intelkhawm chuan tun hnaia hman thar, Mizotaxi Application chu High Court-ah khin an tum.

MTA, ATTA leh ADAROA office bearer theuhte chu nimin Inrinni khan thukhawmin Mizotaxi Application chu High Court-a kalpui turin thutlukna an siam a. Hemi chungchanga Akashvani Aizawl News zawhna chhangin, ATTA President Pu Lalhmunmawia chuan Mizo Taxi application an hman duh loh chhan hrang hrang zingah rate ennawn hmasak an duh thu te, registration fee awm lo se tih te leh app hmangtu mipuiten chhiah za a 6 an chawi tur te a tel tih sawiin, sorkar hnenah pawh an thlen tawh a ti a. He app chungchang hi an zirchian hnuah Motor vehicle rules zawm loh engemawzat a awm ni a an hriat bawk avangin a rang thei ang bera High Court kalpui turin thutlukna an siam tih a sawi.

Lirthei hmanga eizawng pawl pathumte dodalna hnuaiah MizoTaxi online application hi Nilaini khan Transport Minister Pu Vanlalhlana'n tlangzarhin hman tan nghal a ni a, tlangzarh hma ni June ni 30 thleng khan lirthei 974 inziak lut an awm tawh a, chungte chu 4-Wheeler Taxi 275, Auto Rickshaw 17 leh 2 Wheeler taxi 683 an ni a. MizoTaxi online application hmang tur hian Cheng 500- inziah luh a ngai a ni.

State Transport Authority (STA) chuan hriattirna a tihchhuah-ah Mizo Taxi App-a inziah luh hun tawp thlenga inziaklut an tlem a, Mizo mipui a phuhruk loh chuan Mizo Taxi App hmanga tlan tur permit pek chhuah an tum thu an lo sawi tawh a ni.

<><><>

ASF

Nizan khan Assam Cachar atanga dan phalloh vawk note 40 Mizorama phurh luh tum chu Saihapui V Police Outpost-ah thawn kir a ni.

Vairengte Vawkvulh Society chairman hnen atanga kan palai thudawn danin Mizoram a vawk note phurh luh tum hi a vawikhatna anih loh thu sawiin thla hmasa pawn report an dawn angin thawn let an lo neih nual tawh a ti a, heng vawk note phurh luh tum te hi mimal sumdawng an nih thin thu a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MONSOON

Chhimthlang lam atanga fupui thawk mek Southwest Monsoon chu a zual zel avangin ramchhung hmun hrang hrangah inralring tura hriattirna chhuah a ni. Fur thawk mek hian ruah,tek leh thli a ken tel avangin Gujarat, Haryana, Punjab leh Rajasthan hmun thenkhatah te ni li chhung ruah sur nasa tura hmuhlawk a ni a. Heng bakah hian Chhatisgarh, Mahdya Pradesh, Rajasthan, Karnataka, Uttarakhand ah te pawh ruah sur tura sawilawk a ni bawk.

Maharastra ah chuan ruahsur nasa vangin hmun tam takah harsatna a thleng a. Mumbai-a Chhatrapati Shivaji Maharaj International Airport ah chuan ruahsur nasa vang hian hnathawh a khaihlawk a, thlawhna thlawk tur engemawzat tikhawtlai a ni. Thingtlu avangin khawpui chhungah mi pahnih an thi a. Thane leh Palghar district hmun thenkhatah chhiatna a thleng bawk a ni.

<><><>

VBGRAM G

Union Agriculture and Rural Development Minister Shivraj Singh Chouhan chuan Viksit Bharat- Guarantee for Rozgar and Ajeevika Mission (Gramin) VB G RAM G hnuaia sum pek hmasa ber tur Cheng vaibelchhe sing 2 leh sang 5 a pe chhuak. Pu Chouhan-a hian state Rural Development Minister te nen he scheme hman anih dan hi an thlirho a. Thusawiin nimina sum an pekchhuah chu ni 15 chhunga hlawh pek chhuah hman anih theih nana sum ruahman a ni a ti.

<><><>

WC

FIFA World Cup 2026 khelk mekah nizan khan Round of 16 inkhelah Norway chuan champion tura rinkai zinga mi Brazil chu 2-1 in an hneh a. Norway tan hian Erling Halaand chuan goal 2 a thun a, Brazil tan Neymar-in goal khat a thun ve bawk a ni. Tunah hian team ngaihven hlawh England leh a thlengtu ram pakhat Mexico ten Round of 16 an khel mek bawk a ni.

<><><>